

Communicaziun allas medias digl cumegn da Surses (nr. 09-2023)

Surses: La concessiun digl ewz per las ovras electricas Tinizong e Nandro na duess betg neir renovada

La radunanza communal Surses ò nego la dumonda digl ewz da renovar la concessiun digl dretg dallas avas existenta per las ovras electricas da Tinizong e Nandro, tgi scada igl 2035. Ossa stò decider anc igl cumegn d'urna Surses an tgossa. Pinavant ò la radunanza communal approvo dus credits e delibero la revisiun parziala dalla planisaziun locala «Parnoztrail».

Sen proposta dalla suprastanza e dalla «cumischung da scadenza», tgi è neida installada aposta per la dumonda dalla scadenza digls implants a Tinizong e Nandro, ò la radunanza communal nego cun gronda pluralitad la dumonda digl ewz (Ovra electrica digl martgea da Turitg) da renovar la concessiun digl dretg dallas avas existenta. La Regenza grischuna ò sustignia la proposta dalla suprastanza e dalla cumischung da scadenza ed ò recumando an en screiver agl cumegn da negar la dumonda digl ewz. La concessiun digl dretg dallas avas existenta an favour digl ewz scada igl 2035.

Cun chella decisiun negativa sa resalva igl cumegn igl dretg da pudeir decider libramaintg a tge partenari tg'el vot dar ena nova concessiun. La suprastanza communal e la cumischung da scadenza vottan tigneir avert cotras tot las opziuns d'ager. Igls ulteriours sclarimaints vign igl cumegn a far ansemen cun la cumischung da scadenza, alla basa dalla strategia cantunala davart la forza hidraulica. I vign preciso tgi chella decisiun è betg drizzada cunter igl ewz, ma tgi ella duess garanteir agl cumegn la cumplagna libertad da decider. Ena collaboraziun cun igl ewz è da prancepi pussebla er venavant.

Igls 21 da schaner 2024 vignan las votantas ed igls votants digl cumegn da Surses a decider all'urna da moda finala davart la dumonda digl ewz da renovar la concessiun existenta. Tar chella decisiun da prancepi na vogl betg anc per l'execuziun effectiva digl return agl proprietari.

Credit per reactivar la regiun alluvieida dall'Alp Curtegn

Cun gronda pluralitad ò igl suveran approvo igl credit net da CHF 761'000.00 per reactivar la regiun alluvieida dall'Alp Curtegn a Radons. Igl perimeter da project cumpeggia ena lunghezza da canal dall'Ava da Nandro da radond 2'000 m aint igl territori dalla regiun alluvieida dall'Alp Curtegn, tgi è d'impurtanza naziunala. Siva da precipitaziuns ins ò stuia intervigneir igls davos onns adegna puspe cun maschinas ainten la regiun alluvieida. Ossa duess neir mess a disposiziun all'Ava da Nandro puspe la grondezza uriunda dalla regiun alluvieida. Igls costs totals per realisar igl project montan a radond 2.3 miu. francs. Cantun e confederaziun sa participeschon cun 62% e la Corporaziun d'alp Val Nandro cun 5% agls costs da construcziun. Las lavours vignan exequeidas sur ena perioda da 3 onns.

Ulteriouras decisiuns

Sainza discussiun ò la radunanza communal approvo igl credit d'impegn da CHF 430'000.00 per sanar la piazza davant igl local da pumpiers e davant la basa digl Uffezi da construcziun bassa (district 7) ainten la zona d'industreia Gravas a Cunter. Las parcelas èn an proprietad digl cumegn, tgi dat a tschains igls locals.

Cun gronda pluralitad è neida deliberada er la revisiun parziala dalla planisaziun locala «Parnoztrail» per mangs dall'exposiziun da recurs publica e siva per l'approvaziun antras la regenza. La revisiun parziala è necessaria per realisar la senda da velos da muntogna per famiglias e principants da Parnoz a Savognin. Igl è planiso da realisar igl project la stad/aton 2024.

Infurmaziuns:

Leo Thomann, mastral (e-mail: leo.thomann@surses.ch, telefonign 079 405 96 73)

Tinizong, igls 8 da november 2023